

雪橋詩話餘集

卷之四

雪橋詩話餘集卷第二

遼陽楊鍾義撰集

吳興劉承幹參校

李舒章以諸生授官分校順天乙酉鄉試得才最盛大興朱右君大司空出其門讜直端亮不爲嬖阿依比癸亥以會推事引罪家居丁卯卒查初白哭司空詩云正色持朝議逢人指異同不聞廷辨語真有大臣風局定閒居後名高薄譴中肯留毫髮恨物論久方公嘗疏言部臣疑事畏事之念多任勞任怨之意少事稍重大則請會議不然遷延日月行查而已不然聽督撫參奏科

道指糾而已不然苟且塞責無容再議而已宜擇人久
任責成效而定賞罰無稍姑息又疏論懲貪過峻凡得
贓十兩以上者卽流徙塞北此令一出而天下不復有
清官矣何則令嚴則思遁有司攫財以媚其上上官挾
朝廷之禁以恫喝求之於下撫按所糾者必皆罷輒殘
疾無有以大貪入告者有嚴令之名無行令之實也但
擇撫按一大貪者而懲之擇一大廉者而獎之眾貪懼
而眾廉奮矣凡所陳奏尤以惜人才重國體爲急徐健
菴謂讀其疏章雖宋之田表正范蜀公殆無以過嘗有
句云人生那免二毛鬢樂事無過三月花

柏鄉相國因事納忠受 世祖深眷嘗召諭云朕擢卿
非有人薦達康熙初元請罷練餉主庚戌會試得士如
徐健菴李安溪王藻儒張運青皆至卿相陸清獻以理
學從祀黌宮嘗自作贊生平嚮慕留侯二疏及裴晉公
白樂天之爲人其出處亦略相類焉里居十六年益務
讀書課農桑循行阡陌人不知爲舊相也過傳掌雷小
園云藉花能醉客坐樹不妨鶯送友人自青玉歸云故
園一片月相照共生平閒情逸韻亦見道心

本朝倪天作伉不登漢裔編爲令甲惟 世祖恪妃石
氏爲吏部侍郎石申女侍郎字仲生直隸灤州籍黃岡

人順治三年進士能詩秋日同芝麓諸公集黑窯廠分
賦云車馬紛城闕尋秋此地偏路深鐘響出臺古燒痕
圓老樹侵沙苑饑鷹獵塞田與君期盡醉休問戰爭年
華亭張蓼匪以丁亥進士官水部出督清江船務攝漕
政兼理鹽務擢浙江提學戊子分校順天拔熊次侯于
遺卷中嫻武事能于馬上揮戈官至陝西西甯道秋日
過馮氏廢園云舊苑孤亭落日斜滿林荒草憶繁華兼
葭蕭瑟疑秋雨竹樹蒼茫隔晚霞松下虛堂閒臥石溪
邊小鳥立寒沙百年臺榭今誰在燕子猶尋王謝家詩
筆駿偉宜其有聲幾社中也

宋直方生明萬歷末得見董元宰陳眉公復周旋夏瑗
公陳臥子閒與臥子及李舒章稱雲閒三子嘗爲杜讓
水談董陳及夏陳遺事讓水紀以長歌有云文敏揮毫
積若山四裔走幣況人寰獨卻內官與二氏止書名姓
絕躋攀麋公老人眞上智不憂闖獻憂東事垂老談兵
刺不休相國無端干物議考功擁戴志仍堅佞子移文
實妬賢高岡羅網繳衰鳳小山蔓棘泣跼薦給諫雄謀
絀展孝及爾抽身苦不早四海同心半古人五朝亡命
推元老兩公抱蘊慘不舒請兵甯南亦已疏先生與聞
不見用楚師東下徒邱墟瑗公嘗令將樂有政聲門下

士最盛馬阮坐以擁立踞藩高蹈屏息薙髮令下遂披削著幸存錄一卷浮海諸公強之太湖羣盜迫之均不就招撫洪公致之出謁遂捐身以報國臥子上書觸璫孳曾手擊艾千子於西銘座上禽東陽許都後以奉養祖母請告馬阮時志清君側遣張唐兩生請左公入援練水師三千人名振武營東義健兒來依門下甚眾稱義師者附以舉事嘗避難至侯雍瞻所居時太夫人八十餘子孝岐方二歲未忍遽遂蹈海之節而門下士多以舉義來說游士亦多以僞命相誘遂畢命于五月十三日李素心購其元與王勝時併力棺斂皆讓水所記

遺事也舒章當平時卽談弢符習騎射甲申其父逢申
被賊考掠至死日朝拜莊烈梓宮夜守父殯 本朝定
鼎卽時登用爲內宏院中書舍人下江南詔出其手制
冊誥命皆所手定亦見讓水八執詩注讓水尊人仁趾
職方與瑗公臥子暨徐閩公彭燕又周勒卣創幾社故
其紀社事尤詳

周釜山茂源周旋陳夏閒夏存古王后張顧子韶皆在
門下掄乙酉鄉薦丁亥下第館大名相國家己丑舉進
士授秋曹慮囚中州釋無辜者千計杜讓水詩臥治中
州疏滯獄活人千計抵陽春祇憂好友逢天怒不戀長

安乞米人謂顧刑張逮爲之惕然遂決意乞外也出守
括蒼以逋賦之獄歸田子鷹垂孫冰持並有才名

陽城田兼山司農六善起家太康以治行入農曹遷臺
諫順治己亥疏請獎勸清吏康熙壬子疏言臣里居時
伏讀 上諭以蘇克薩哈爲鼇拜讐陷殺其子孫連坐
族人白爾赫圖皆爲冤枉恩予昭雪眞合王者罪人不
孥之意臣思施仁之法莫大于省刑立法之謀必先於
重本以滿洲勞苦功高之人因與執政諸臣意見相左
輒牽累大案恐百世之後尤而效之怨讐相尋借端推
刃祈特制訓誥昭示來茲滿洲犯罪非反叛者勿妄議

株連下部議行癸丑疏請諭日講諸書通鑑與經書並
進無所忌諱明年特擢僉都益自感奮知無不言質直
無文飾不少唯阿辛酉以戶部左侍郎致仕歸沈心齋
贈詩有入告萬言書有淚出持羣議案如山之句自言
歷官四十年無一念不可對天無一事或敢欺人與魏
敏果以道義相規勉于清端撫保定公實舉之其十七
年應詔陳言謂今日官至督撫居莫敢誰何之勢自非
大賢鮮不放縱道府每年進規禮再行搜括則道府所
轄之官民如賣之道府矣州縣每年責規禮再行嚇索
則州縣所屬之士民如賣之州縣矣巡方久停欲議復

恐難得人惟澄清一省選一人遣行兩省則選兩人或
一年二年再清某省則再選不必一時俱遣出其不意
示以不測使貪惡之官不敢恃督撫之熟交而肆志不
肖督撫亦不敢自謂莫可誰何而茹貪害民此固言人
所難言也

鄧元昭檢討先世家洞庭山明初實鳳陽復自臨淮徙
壽州明季卽次於江甯旣第進士因入籍焉扶義倜儻
遭齟齬遷洮岷道副使得請歸屏居幾三十年五嶽游
其四卒於康熙癸亥年七十五酷嗜長吉古體多奇語
近體似王孟閒入於溫李丁未冬杪踏雪過嶽麓尋禹

碑歸值腑山和尚馬首留宿賦贈云貪山老更奇縱棹
凌窮九雪滿嶽麓顛破凍看蚪蚪高嘯落川谷紛拏玉
龍走所撼支道林尋侶出洞口我貯衡山雲囊緘來一
剖禹碑蜿蜒下籃輿擎雙肘路轉道鄉臺恰逢神駿首
把臂兩軒渠邀我宿巖藪爐煨楸火煖氣浮座右黃
齏粥一盂醉逾醒酬酒公昔在白門謂我非其偶雉堞
隔萬竹竟不我顧取須知住世人有眼大如斗踏徧選
佛場尊宿難數有憶昨老古錐號爲天子友宸翰與紫
衣壓殺侍者手試問西來意緇素誰勝負我今宿公牀
鼯齏良非偶愛公結茅屋湘江當戶牖星沙城咫尺豎

拂未曾苟一衲二十年臥聽羣虎听能以海底光涌出
功德母鑢鋤洗鍊書味盎然

康熙中于清端于襄勤二公同名皆以清忠彊直爲名
臣襄勤之太公得水以累有戰功授三等阿達哈哈番
癸巳湖南之役爲右路副總兵有蟒服鞍馬之賜戊戌
有事於滇南持戟陷陣克沅江襄勤以蔭知樂亭翁輒
誡之曰吾受朝廷恩無以報汝其勉之縣令者民之父
母慎毋以百里之地力可優爲而易視之也甲子南巡
襄勤以下河之任由江甯郡晉臬司迴鑾之日召翁入
見加慰勞謂汝昔宣力王家勤勞懋著今汝子居官盡

職皆汝義方所致並傳諭八旗父兄教其子弟當以于
某爲法隨賜官衣貂裘各一襲庚午襄勤由直撫入爲
都御史兼領都統 聖祖特賜甲第一區知其清貧不
能營居室也喬學齋吉士崇烈呈于公成龍詩惟帝建
極洪化成天下刑措歌由庚惟河不治娛蛟鯨山鹽江
泰高寶興帝尤念之心怵怵歲捐歲賑恩莫京海口不
濬民不生我公銜命來東瀛治河使某窮心兵曰田可
奪民可阬如虎負嵎孰敢撓公持其鬚人爲驚兩議勅
下詢九卿僉曰河使議莫更乃召面折聲如鑢明日帝
復咨殿楹與九卿議還同聲家公珥筆殊惛惛十萬不

值鴻毛輕會帝顧問乃攄誠四不可議文崢嶸河使語
塞雙目瞠詔下卒如公議行到今比戶炊香杭學齋子
靜子

武進董易農由行人官江南道御史爾時臺臣不同避
本省也庚子十二月廿四日彈學臣谷應泰疏入 世
祖敕中使宣至南苑賜茶暮令二騎送歸除夕詩有中
使朝宣收諫草羽林夕送賜宮茶之句又秋興詩云朝
封諫草九重來暮賜宮茶帳殿開衛士遠騎天馬送小
臣看掠角鷹迴狂言不避將軍諱年少誰憐賈傅才龍
去鼎湖髯半墜園林白露每興哀則丁未左官後作也

戊申之官秦隴道病得請其與龔尙書書云驥進言之
日彗舊布新龍震水立奮而應詔以爲更張一切所致
惟率由 先帝成憲可以格天地臻太平執政不察留
中月餘率以此一麾而出 聖祖親政悉復舊章從前
言事者多召還則固用其言矣

上海朱蒿菴給諫紹鳳居諫垣四載奏輒報可戊戌以
論周亮工保閩有功案宜速結忤 旨降謫建甯司獄
詠茉莉云疏星點點簇芳叢素質含香玉露中抱影自
憐今夜月承恩不向蕊珠宮

海鹽張螺浮給諫以乙未進士官黃門其停圈占革廠